

आकाशवाणी

खास खबरां

- 1 प्रधानमंत्री नरेन्द्र मोदी होरें आखेआ जे 2047 तगर भारत गी इक विकसित राष्ट्र बनाना हर इक भारतवासी दी महत्वकांक्षा ऐ।
- 2 विदेशी मामलें दे मंत्री डॉ. एस.जयशंकर होरें आसियान फोरम च वैश्विक सैहयोग पर दित्ता जोर।
- 3 प्रधानमंत्री होर कल “मन की बात” कार्यक्रम च अपने बचार सांझे करगंन।
- 4 सुप्रीम कोर्ट दे न्यायधीश सूर्य कांत होरें बसनीकें गी खास लोक अदालत हफ्ते च हिस्सा लैने आस्तै दित्ता साददा।
- 5 सरकार दी नमीं इंटरशिप योजना कन्नै अगले 5 ब'रे च 4 करोड़ भारती नोजवानें गी लाह थ्होग—आखेआ मनसुख मांडविया होरें।

<><><><><><>

PM-Niti

प्रधानमंत्री नरेन्द्र मोदी होरें आखेआ ऐ जे 2027 तगर भारत गी इक विकसित राष्ट्र बनाना हर इक भारतवासी दी महत्वकांक्षा ऐ ते हर इक राज्य इस लक्ष्य गी हासल करने च मती महत्वै आली भूमका नभाई सकदा ऐ की जे ओह सिद्धे तौर पर लोकें कन्ने जुड़े दे न। श्री मोदी होरें एह गल्ल अज्ज नीति आयोग दी गवर्निंग काउंसल दी 9मीं बैठक दी प्रधानता करदे होई आक्खी। बैठक दुरान 2047 तगर भारत गी विकसित राष्ट्र बनाने बक्खी ध्यान केन्द्रित कीता गेआ। प्रधानमंत्री होरें आखेआ जे विकसित राज्यें कन्नै गै विकसित भारत बनोग। भारत दी जनसंख्या च खरे मते नोजवान न ते पूरी दुनिया इस करियै भारत दे कार्यबल आस्तै भारत बक्खी आकर्षित ऐ। उनें आखेआ जे कौशल, अनुसंधान नवीनता ते कम्म दी जानकारी विकसित भारत दा सुखना पूरा करने आस्ते जरूरी ऐ। साढ़े

देश सेही बक्खी बधा'रदा ऐ। खबर लिखने तोड़ी नीति आयोग दी गवर्निंग काउंसल दी बैठक राष्ट्रपति भवन दे सांस्कृतिक केन्द्र च चला'रदी ही। इस बैठक च राज्यें दे केन्द्र शासत प्रदेशें दे उपराज्यपाल, केन्द्री मंत्री , उंदे दफ्तरे दे अधिकारिएं खास परौहने उपाध्यक्ष सुमन बेरी ते नीति आयोग दे सदस्ये हिस्सा लै'रदे न। एहदा मकसद केन्द्र ते राज्य सरकारें बश्कार भागीदारी आला शासन ते सैहयोग होर बधाना ऐ तां जे ग्रामीण ते शैहरी इलाकें च रौहने आले लोकें दे जीन जीने दे मय्यार च बेहतरी आहन्नी जाई सकै। एह काउंसल मुख सचिव दे त्रीए राष्ट्र सम्मेलन दी सिफारशें पर ध्यान देग जेहड़ी गै पिछले ब'रे दिसम्बर च होई ही।

<><><><><><>

Amarnath Yatra

अधिकारिएं मताबक इस ब'रे दी सालाना श्री अमरनाथ जी दी यात्रा च तकरीबन 4 लक्ख 50 ज्हार यात्रुएं पवित्र गुफा दे दर्शन करी चुके दे न ते एह आंकड़ा पिछले ब'रे दे आंकड़े गी पार करी चुके दा ऐ। अधिकारिएं मताबक कल संजा तगर 8 ज्हार 781 यात्रुएं बालटाल ते चंदनवाड़ी रस्ते राएं यात्रा करियै पवित्र गुफा च हिमलिंगम दे दर्शन कीते। 1 ज्हार 771 यात्रुएं दा नमां जत्था जम्मू दे भगवती नगर आले आधार शिविर थमां कश्मीरलेई रवाना होआ। 52 दिन चलने आली एह यात्रा सौन म्हीने दी रक्खड़ पुन्नेआ गी खत्म होइ जाग। इस दिन हिंदुए दा ध्यार रक्खड़ी बी हुंदा ऐ ते एह ध्यार इस ब'रे 19 अगस्त गी आवा करदा ऐ। इस दिन पवित्र छड़ी श्रीनगर दे दशनमी अखाड़े थमां पवित्र गुफा महंत दिपेन्द्र गिरी जी हुंदी सरपरस्ती च पुज्जग। इस छड़ी यात्रा च केई साधु ते श्रद्धालु बी शामिल होंगन। पूरा दिन पवित्र गुफा च पूजा दे बाद पवित्र छड़ी उस्सै दिन संजा लै पंचतरणी उठी औग ते रातीं लै उत्थें बसांह करियै अगले दिन एह पहलगाम वापस आई जाग।

<><><><><><>

APJ Kalam

अज्ज राष्ट्र साबका राष्ट्रपति ते मन्ने परमन्ने दे साईसदान ए.पी.जे.अब्दुल कलाम होरें गी उंदी 9मीं पुन्यतिथि पर भावें भरोची श्रद्धांजलि देआ करदा ऐ। उनें भारत च अंतरिक्ष ते मिसाईल विकास कार्यक्रम च महत्वपूर्ण भूमका नभाई ही। उनें मिसाईल मैन ऑफ इंडिया दे नां कन्नै बी जानेआ जंदा ऐ। उंदा देहांत अज्जै दे दिन यानि 27 जुलाई 2015 च होआ हा।

<><><><><><>

Jaishankar

विदेश मंत्री डॉ. एस.जयशंकर होरें आखेआ जे अंतर्राष्ट्रीय सैहयोग गै दुनिया दा कल्याण दे वैश्विक समुदाय दी सुरक्षा गी पक्का करदा ऐ। अज्ज वियनतियाने के लाओ पीडीआर दे 31में आसियान क्षेत्री मंच पर उनें आखेआ जे नमीं प्रौद्योगिकी दा प्रसार ते वैश्विकरण दी लगातार निर्भरता दा गलत फायदा नेई चुककना चाहिदा। डॉ. जयशंकर होरें आखेआ जे कोविड, संघर्ष, जलवायु बदलाव हुने आली गलत हालत गी उजागर करदे न। उनें इस गल्ल पर जोर पाया जे सिर्फ आर्थिक सहायता, राजनहति, प्रौद्योगिकी ते संपर्क दे जरियै हल निकली सकदा ऐ। विदेश मंत्री होरें आखेआ जे असें आतंकवाद दे सारे रूपै कन्नै मकाबला करने, आतंकी ठकानें ते संयुक्त राष्ट्र तरफा प्रतिबंधत आतंकवाद सरबन्धी पैसा उपलब्ध कराने दे नेटवर्क गी खत्म करने ते साइबर अपराध कन्नै निबड़ने च मजबूत होना लोड़चदा।

<><><><><><>

UNESCO-Heritage

यूनेस्को नै अज्ज विश्व धरोहर थाहरें दी सूचि च 7 नमीं टकोहदी थाहरां शामिल कीतियां न। नमीं दिल्ली च भारत मंडपम च आयोजित 46 विश्व धरोहर कमेटी सत्र च एह नमियां थाहरां शामिल कीतियां गेइयां। इंदे च जापान दा साडो टापू सुन्ने दी खदानां, चीन दा बिजिंग सेंट्रल एक्सीस, थाईलैंड दा फू फ्राबाट

एतिहासक पार्क, रूस दी केनोजिरो झील दा इलाका, किनिया दा एतिहासक कस्बा, गेड़ी दी पुरातत्व थाहर, दक्खन अफ्रीका दी मान अधिकारें, मुक्ति ते आपसी सुलाह् आस्तै नेल्सन मंडेला थाहर ते मलेशिया दा निआह नेशनल पार्क गुफा परिसर शामिल न। इनें सारी थाहरें दा चुनां सांस्कृतिक श्रेणी हेठ कीता गेआ ऐ।

<><><><><><>

PM-Mann Ki Baat

प्रधानमंत्री नरेन्द्र मोदी होर कल बडलै 11 बजे आकाशवाणी थमां “मन की बात” कार्यक्रम राएं देस ते विदेश दे लोकें कन्नै अपने बचार सांझे करगंन। एह महावार इस रेडियो कार्यक्रम दी 112मीं किश्त होग। एह श्री मोदी हुंदे लगातार त्रीह बारी प्रधानमंत्री बनने दे परैंत इस कार्यक्रम दी दूई किश्त होग। एह कार्यक्रम आकाशवाणी, दूरदर्शन, एयर न्यूज वेबसाईट ते न्यूज ऑन एयर दे सारे नेटवर्क उप्पर प्रसारत होग। इस कार्यक्र दा सिद्दा प्रसारण आकाशवाणी समाचार, डी.डी. न्यूज, पीएमओ ते सूचना ते प्रसारण मंत्रालय दे यूट्यूब चैनलें उप्पर बी कीता जाग। आकाशवाणी इस कार्यक्रम दा प्रसारण हिंदी भाषा च होने दे तुरत परैंत क्षेत्रीय भाषाएं च बी करोग।

<><><><><><>

Justice Surya Kant

सुप्रीम कोर्ट दे न्यायधीश सूर्यकांत होरें लोआए जाने आले खास लोक अदालत हफ्ता च बसनीकें गी हिस्सा लैने दा साददा दित्ता ऐ। एह हफ्ता 29 जुलाई थमां 3 गस्त तोड़ी चलोग। आकाशवाणी समाचार कन्नै खास गल्लबात च नयायधीश होरें दस्सेआ जे ब्याह शादी ते जायदाद सरबंघ दे मामले दा नबेड़ा, दुर्घटना मुआवजा, बक्ख-बक्ख परियोजना च जमीन हासल करने दे सरबंघ च मुआवजा,

सेवा ते श्रम मुद्दे पर इस खास अदालत च गौर फरमाया जाग। उनें दस्सेआ जे इस पैहल दे हेठ दूर—दरेड़े थाहरें थमां बी वीडियो कांफ्रेंसिंग राएं हिस्सा लैता जाई सकदा ऐ।

<><><><><><>

Kerala Special NET

मच्छी, पशुपालन ते डेयरी दे राज्य मंत्री जॉर्ज कुरियां होरें आखेआ ऐ जे देश दे मच्छी पालन अनुसंधान संस्थानें तरफा इक खास जाल विकसित कीता जा'रदा ऐ जेह्दे थमां समुंद्र खचोपड़ बाहर रौंहगन ते इस जाल दी गुणवत्ता तौले गै दस्सी जाग। कोचि च मीडियाकर्मिं गी संबोधत करदे होई उनें दस्सेआ जे भारत अमरिला गी 40 ज्हार करोड़ रपे दी कीमत दे निर्यात करदा ऐ जेह्दे चा 90 फीसदी प्रवन एक्वाकल्चर कन्नै तैआर कीते जंदे न ते बचे दे 10 फीसदी प्रवन समुंद्र थमां फड़े जंदे न। अमरीका तरफा भारती शरिप पर रोक लाने दी पछोकड़ै च मंत्री होरें एह् ब्यान दित्ता जेह्दे च बगैर कुसा रोकटाक दे मच्छी फगड़ने दे कम्म पर चिंता जताई गई ऐ जेह्दे नतीजे च समुंद्री खचोपड़ बी जाल च फसी जंदे न ते उनें चोट बी लगदी ऐ।

<><><><><><>

Bangladesh

बंगलादेश च “स्टूडेंट अगेंस्ट डिसक्रिमीनेशन” ना कन्नै चलाए जा'रदे आंदोलन कन्नै जुड़े दे 3 नेताएं गी ढाका पुलस दी जसूसी शाखा ने शुक्रवारे दपैहरी उनेंगी मिली दी धमकिं दे चलदे हिरासत च लैता ऐ। इंदे च नाहिद इस्लाम, आसिफ महमूद ते अबु मजुमदार शामिल न। ढाका पुलस दे अडिशनल कमीशनर मोहम्मद हयन—अर—रशिद नै पत्रकारें गी दस्सेआ जे इनें नेताएं दी सुरक्षा पक्की करने ताई उनेंगी हिरासत च लैता गेआ ऐ। एह्दे शा पैहले इनें त्रै नेताएं गी

ढाका दे अस्पताल शा हिरासत च लैता गेआ हा, 2 नेताएं दा अस्पताल च इलाज चला'रदा हा। तोआई बंगलादेशदे गृहमंत्री होरें इक प्रेस वार्ता च इने त्रै नेताएं दी गिरफ्तारी गी पक्का कीता।

<><><><><><>

Accident

सिनथन—कुकरनाग रस्ते उपपर इक शिड़क हादसे च 8 लोक जिंदे च इक पुलस आला ते 5 बच्चे शामिल न दी मौत होइ गेइ ऐ। कुकरनाग दे सब डिस्ट्रिक मैजीस्ट्रेट सुनील अहमद लोन होरें दस्सेआ जे अरशान दकसुम दे कोल होए दे इस हादसे च इक पुलस आले सनें 5 बच्चे ते 2 महिलाएं दी मौत होई ऐ। उनें आखेआ ऐ जे एह गड्डी जिस च एह सारे बैठे दे हे, मादवा किशतवाड़ थमां आवा करदी ही। इंदा पोस्टमार्टम एसडीएच कुकरनाग च होआ करदा ऐ। उपराज्यपाल मनोज सिन्हा होरें इस शिड़क हादसे उपपर डूंहगा दुख प्रगट कीता ऐ। अपने सनेए च उपराज्यपाल होरें आखेआ ऐ जे अज्ज अनंतनाग दे दकसुम च होए दे इस शिड़क हादसे नै उनेंगी गैहरा दुख पुज्जा ऐ ते पीड़ित परोआरें लेइ दुख सैह्न करने दी परमात्मा कोला प्रार्थना करदे न। उनें जिला प्रशासन गी हर संभव मदद लेई निर्देश दित्ते।

<><><><><><>

PM-Modi

प्रधानमंत्री नरेन्द्र मोदी होरें नमो ऐप पर बजट 2024 दी मूल योजना सांझी कीती ऐ। एहदे मकसद रोजगार सृजन ते कौशल कन्ने सरबंधत बक्ख—बक्ख सरकारी घोषणाएं, योजनाएं ते नमीं पैहूलकदमिएं गी सौकखे तरीके कन्नै समझाना ऐ। श्री मोदी होरें सोशल मीडिया मंच—एक्स पर आखेआ जे बजट—2024 दा लक्ष्य रोजगार कन्नै जुड़ी दी नमीं प्रोत्साहन योजनाएं दे राएं नौकरियां पैदा करना, इक तगड़े कार्यबल दा निर्माण करना ते नौकरियां देने आलें गी सक्षम बनाना ऐ।

<><><><><><>

BJP CM Meet

बीजेपी शासत राज्यें दे मुखमंत्रिण दी अज्ज संजा लै नमीं दिल्ली च बैठक होग। बैठक पार्टी मुख्यालय च होग ते एह्दे च वरिष्ठ पार्टी नेता हिस्सा लैंगन। एह बैठक लोकसभा चुनाण मगरा ते केन्द्री बजट पेश होने दे किश दिनें परैत होआरदी ऐ। सरकारी स्कीमें गी निगगर तरीके कन्ने लागू करना, राज्यें थमां प्रतिक्रिया ते दुए मुद्दे च इस उच्च स्तरीय बैठक च पुट्टे जांगन।

<><><><><><>

Mandviya

खेड्डे ते युवा मामले दे मंत्री मनसुख मांडविया होरें अज्ज आखेआ जे हाल च पेश कीते गेदे केन्द्रीय बजट च शामिल इंटरशिप स्कीम कन्ने अगले 5 बरें च 4 करोड़ शा मते नोजवानें गी रोजगार, कौशल विकास ते दुए मौके हासल होंगन। मीडिया कन्ने गल्लबात करदे होई मंत्री होरें आखेआ जे अव्वल दर्जे दी कंपनिण च इंटरशिप दा तर्जुबा नोजवानें दा भविष्य च शैल बनोग। इस इंटरशिप स्कीम दे हेठ सरकार 1 करोड़ नोजवानें गी 5 बरें च 5 सौ बड्डी कनिण च भेजग। इस 12 म्हीने दी इंटरशिप च इक्कै बारी दित्ते जाने आली 6 जहार रपे दी मदाद दे कन्ने 5 जहार रपे हर म्हीने दित्ते जांगन।

<><><><><><>

Paris Olympic

भारती खेल प्राधिकरण ते रिलायंस फाउंडेशन दी नमीं शुरूआत “इंडिया हाउस” दी ढोल दी ताल ते नाच कन्ने पैरिस च बरखा बशकार दपैहरी आगाज होआं इस कार्यक्रम च भारती संस्कृति ते कला गी उजागर कीता जाग, मशहूर गायक शान हुंदी पेशकश होग ते श्री समग्रि व्याम मंदर दे दिक्खी सकने च अक्षम दिवयांग खडारी माल्लाखम्भ पेश करगंन। दीप प्रजवलन भारती ओलंपिक परिषद दी सदस्य ते रिलायंस फाउंडेशन दी अध्रूखता श्रीमती नीता अंबानी होर करगंन।

मर्दे दे 10 मीटर एयर पिस्टल मकाबले च भारत लेई बुरी खबर सरबजोत सिंह 9में ते अर्जुन चीमा 22में थाहर पर रेह। पैहले 8 खडारी मेडल राउंड च पुज्जे।

<><><><><><>

Army Kupwara

कुपवाड़ा जिले दे कमाकारी सेक्टर च पाकिस्तान दी बार्डर एक्शन टीम—बैट दे हमले गी अज्ज भारती फौजे नाकाम बनाई दित्ता ऐ। बैट दे इस हमले च फौज दा इक जवान शहीद होआ ऐ ते इक कैप्टन सनें कुल 4 फौजी जख्मी होई गे न। फौज दे सूत्रें मूजब इस कारवाई दरान इक घुसपैठिया मारेआ गेआ ऐ। बैट च आमतौर पर पाकिस्तानी स्पेशल फोर्सिस दे कर्मी ते आतंकवादी शामिल हुंदे न। सूत्रें मूजब त्रै घुसपैठिएं दे इक दल नै पैहले हथगोला सुट्टेआ ते फही त्रेहगाम सेक्टर च कुमकादी पोस्ट दे नेड़े इक अगेत्री चौकी पर गोलीबारी शुरू करी दित्ती। जवानें बी तुरत हरकत च औंदे होई परते आली कारवाई कीती ते टाकरा भखी पेआ। टाकरे दरान 5 जवान जख्मी होई गे जिंदे चा इक नै मगरा दम त्रोड़ी दित्ता। जख्मी होए दे कैप्टन सने होरने जवानें गी उत्थुआं कडिडयै बेस अस्पताल पजाया गेआ जिंदे चा इक दी हालत गंभीर दस्सी जा करदा ऐ।

<><><><><><>

Security Forces Doda

जम्मू कश्मीर च आतंकवादी गतिविधियां बधी जाने ते जम्मू खित्ते दे केई जिलें च विदेशी आतंकवादिएं दे सरगर्म होने गी दिक्खदे होई सुरक्षाबलें खित्ते च आतंकवाद करी प्रभावत होए दे इलाकें च जांच नाके स्थापित करियै निगरानी होर बधाई दित्ती ऐ। आकाशवाणी दे जम्मू संवाददाता मूजब हाल दिएं आतंकी गतिविधिएं करी कठुआ ते डोडा जिला सब्बने शा मते प्रभावत होए न। इस फार्मूले पर अगगे बधदे होई सुरक्षाबलें इक बारी फही हुन लोकें कन्नै जुड़ने दे अपने लतन तेज करी दित्ते न। लोकें गी आखेआ गेआ ऐ जे ओह कुसै बी संदिग्ध नकलो हरकत दी जानकारी तुरत सुरक्षाबलें गी देन। तोआई पुलसै डोडा जिले च इक कैप्टन सनें 4 फौजिएं दी हत्तेआ लेई कसूरवार त्रै आतंकवादिएं दे

स्कैच जारी कीते न ते उंदे सिर पर 15 लक्ख रुपे दे नगद ईनाम दा ऐलान कीता ऐ। तोआई छत्तरगला पॉस, गंदोह, कास्तीगढ़, गद्दी भगवाह जंगलें च 12 जून थमां 18 जुलाई बश्कार होए दे बक्ख-बक्ख आतंकी हमलें च घट्टोघट्ट 10 सुरक्षाकर्मी जख्मी होई गेदे न। जंदी 26 जून गी जिले दे गंदोह इलाके च ध्याड़े भर चले दे अभियान च सुरक्षाबलें 3 आतंकवादिएं गी मारी मकाया हा।

<><><><><><>

MOES Foundation Day

धरत विज्ञान मंत्रालय नै अपना 18मां सीपना दिवस नमीं दिल्ली च पृथ्वी भवन मुख्यालय च मनाया। इस मंत्रालय दी शुरूआत 27 जुलाई 2006 च होइ ह ीते तकरीबन 2 दहाके च मंत्रालय नै धरत विज्ञान प्रणाली च महत्वपूर्ण योगदान दितता ऐ। भारत सरकार दे प्रधान वैज्ञानिक सलाहकार प्रो. अजय कुमार सूद इस मौके मुख परौहने हे। इस कार्यक्रम च मंत्रालय दे सचिव डॉ. एम.रविचंद्रन होरें आखेआ जे मंत्रालय गी 18 ब'रे च हासल कीती गेदी मतिएं उपलब्धिएं पर मान ऐ। उनें दस्सेआ जे विभाग गी दूई महत्वपूर्ण चुनौतिएं आस्तै तैआरी करनी लोड़चदी, खास करी अन्न, पानी, ऊर्जा, सेहत ते मौसम बदलाव।

<><><><><><>